

REGLUR

um Stofnun fræðasetra Háskóla Íslands.

1. gr.

Almennt.

Stofnun fræðasetra Háskóla Íslands er rannsóknar- og þjónustustofnun sem heyrir undir háskólaráð. Stofnunin er vettvangur fyrir samstarf Háskólans um ýmis verkefni við sveitarfélög, stofnanir, fyrirtæki, félagasamtök og einstaklinga.

2. gr.

Hlutverk.

Meginhlutverk stofnunarinnar er að efla rannsóknar- og fræðastarf Háskóla Íslands um land allt með því:

- að skapa háskólamönnum aðstöðu þar sem unnið er að rannsóknaverkefnum í tengslum við staðbundnar aðstæður í umhverfi eða atvinnugreinum,
- að skapa aðstöðu fyrir vettvangsnám háskólanema,
- að auka möguleika til menntunar á landsbyggðinni einkum með því að stuðla að fjarnámi og auknum hlut heimamanna í rannsóknum,
- að styrkja tengsl Háskóla Íslands við atvinnu- og þjóðlíf.

Auk þess vinnur stofnunin að þeim verkefnum sem rektor og háskólaráð fela henni.

3. gr.

Skipulag.

Stofnunin byggist upp á fræða- og háskólasetrum Háskóla Íslands út um landið. Fræða- og háskólasetur eru faglega sjálfstæðar einingar. Um stöðu setranna innan stofnunarinnar gilda eftir því sem við á ákvæði um stofuskipulag háskólastofnana, sbr. 3. tölul. 4. mgr. 27. gr. sameiginlegra reglna fyrir Háskóla Íslands.

Stjórn stofnunarinnar, sbr. 5. gr., tekur ákvörðun um uppbyggingu fræða- og háskólasetra og skipulag þeirra í samráði við rektor. Stjórnin skal kynna fyrir háskólaráði áform um að setja ný setur á laggirnar eða leggja niður starfandi setur áður en ákvörðun er tekin.

Yfir hverju setri er stjórn sem skipuð er a.m.k. þremur mönnum. Stjórn stofnunarinnar, sbr. 5. gr., setur starfsreglur um fræða- og háskólasetur þar sem nánar er kveðið á um fyrirkomulag á stjórn þeirra.

Um starfsemi hvers seturs skal að jafnaði gerður samstarfsamningur við þá aðila sem tengjast starfsemi á hverjum stað. Heimilt er í slíkum samningi að kveða á um stofnun fagráðs sem vinni með stjórn setursins og forstöðumanni.

4. gr.

Aðstaða.

Háskóli Íslands lætur stofnuninni í té starfsaðstöðu, húsnæði og búnað, svo sem kostur er og eftir því sem um er samið við samstarfsaðila.

Stofnunin veitir starfsliði sínu aðstöðu og nauðsynlegan búnað til rannsókna eftir því sem unnt er.

5. gr.

Stjórn.

Háskólaráð skipar stofnuninni fimm manna stjórn til þriggja ára í senn. Formaður stjórnarinnar er skipaður skv. tilnefningu rektors en aðrir stjórnarmenn samkvæmt tilnefningum stjórna starfandi fræðasetra.

6. gr.

Stjórnarfundir.

Formaður stjórnar boðar stjórnarfundir breftlega, eða í tölvupósti, með þriggja daga fyrirvara. Fundarboð skal greina dagskrá fundar.

Skylt er að boða stjórnarfundir óski tveir eða fleiri stjórnarmenn þess. Sama gildir ef rektor ber fram slíka ósk og hefur þá hann eða sá sem sækir fund í umboði hans, málfrelsi og tillögurétt á fundinum.

Falli atkvæði jöfn á stjórnarfundum ræður atkvæði formanns eða þess sem gegnir formannsstörfum.

Halda skal gerðabók stjórnar og skulu staðfestar fundargerðir færðar í hana. Afrit fundargerða skulu send rektor og aðilum samstarfssamninga sem gerðir hafa verið um starfseminu á einstökum stöðum.

Sé ráðinn forstöðumaður til stofnunarinnar situr hann stjórnarfundum með málfrelsi og tillögurétti en án atkvæðisréttar.

Atkvæði þessarar greinar gilda einnig eftir því sem við á um stjórn hvers seturs, sbr. 3. mgr. 3. gr.

7. gr.

Verkefni stjórnar.

Stjórn stofnunarinnar leiðir samstarf Háskólans við aðila á landsbyggðinni og getur í samráði við stjórnir setra haft frumkvæði að því að skapa verkefni og afla fjár til þeirra. Stjórnin veitir forsvarsmönnum einstakra setra leiðsögn og aðstoð eftir því sem unnt er.

Stjórnin tekur stefnumarkandi ákvarðanir fyrir stofnunina og ber ábyrgð á fjármálum hennar gagnvart háskólaráði. Stjórnin samþykkir rekstrar- og fjárhagsáætlun fyrir einstök setur og stofnunina í heild og gerir tillögu að samþykktum um þjónusturannsóknir sem háskólaráð staðfestir.

Stjórnin stendur ásamt rektor að gerð samstarfssamninga um einstök fræðasetur og hefur eftirlit með framkvæmd þeirra samninga sem gerðir hafa verið.

Stjórnin sker úr í vafaatriðum sem upp kunna að koma og varða innri starfsemi stofnunarinnar.

Stjórnin skal hafa víðtækt samráð við deildarforseta sem og stjórnir og forstöðumenn annarra háskólastofnana.

8. gr.

Starfslið.

Rektor leggur stjórninni til starfslið sem sér um framkvæmd á þeim málum sem stjórnin felur viðkomandi starfsmönnum að annast.

9. gr.

Forstöðumenn fræða- og háskólasetra.

Hverju setri stýrir forstöðumaður sem annast daglega starfsemi á hverjum stað, hefur umsjón með fjármálum og skipuleggur samstarfsverkefni. Forstöðumaður er ráðinn af stjórn

setursins, sbr. 3. mgr. 3. gr. Heimilt er að tengja starf forstöðumanns fræða- og háskólaseturs við starf háskólakennara og koma þannig á virku samstarfi milli setursins og viðkomandi skorar. Kveðið skal á um starfstengslin í ráðningarsamningum hverju sinni en tryggt skal að viðkomandi starfsmaður hafi tilgreinda stjórnunarskyldu í þeirri skor sem um ræðir.

10. gr.

Ársfundur.

Stjórn, sbr. 5. gr., efnir til ársfundar stofnunarinnar. Ársfundur er haldinn á haustmánuði- um og er vettvangur umræðu um stefnu og starfsemina.

Ársfundur er öllum opin og skal auglýstur opinberlega bæði innan Háskólans og á almennum vettvangi. Stjórnin býður gestum til þátttöku í fundinum.

Ársskýrsla stofnunarinnar og fjárhagsáætlun næsta árs skulu liggja frammi á fundinum.

11. gr.

Fjármál.

Reikningshald stofnunarinnar skal vera hluti af reikningshaldi Háskólans.

Tekjur Stofnunar fræðasetra Háskóla Íslands eru eftirfarandi:

- a. fjárveitingar skv. ákvörðun háskólaráðs eða rektors,
- b. fé sem stjórn aflar til starfseminnar með samningum við samstarfsaðila,
- c. styrkir til einstakra verkefna eða starfseminnar í heild,
- d. greiðslur fyrir þjónustustarfsemi,
- e. aðrar tekjur, t.d. gjafir og framlag úr ríkissjóði eftir því sem kveðið kann að vera á um í fjárlögum.

Sé um að ræða útselda þjónustu, sem veitt er í samkeppni við einkaaðila, skal sú starfsemi fjárhagslega afmörkuð frá öðrum rekstri háskólasetranna og þess gætt að sá rekstur sé ekki niðurgreiddur með öðrum tekjum, í samræmi við ákvæði samkeppnislaga.

12. gr.

Reglur þessar, sem háskólaráð hefur sett á grundvelli heimildar í 2. mgr. 19. gr. laga nr. 41/1999, um Háskóla Íslands, sbr. 26. gr. reglna nr. 458/2000, fyrir Háskóla Íslands, öðlast þegar gildi.

Ákvæði til bráðabirgða.

Fyrir 1. maí 2003 skal skipa stjórn Stofnunar fræðasetra Háskóla Íslands samkvæmt ákvæðum þessara reglna á grundvelli tilnefninga frá stjórnnum háskólasetursins á Hornafirði, stjórn rannsókn- og fræðaseturs Háskóla Íslands í Vestmannaeyjum, stjórn rannsókn- og fræðasetursins í Hveragerði og verkefnisstjórn um rannsóknastöðina í Sandgerði.

Háskóla Íslands, 21. febrúar 2003.

Páll Skúlason.

Halldór Jónsson.